

Codex Laureshamensis Teil: Bd. 1, Einleitung, Regesten, Chronik Kap. 155b.

Defuncto igitur Folcnando, Hildebertus ex fuldensi monasterio, tum sanctae Mariae virginis in Michlenstat prepositus, primo quidem sub intentione, sed postea reductis in concordiam partibus, abbas eligitur, et ab Heinricho rege quem pater Hierosolimam tendens in regnum unxerat vestitus, necdum consecratus, sexto mense moritur, et ad introitum aecclesiae in latere meridiano tumulatur. Cui e vestigio Marquardus prepositus sancti Petri in Aldenmunster substitutus, et ab eodem rege investitus, undecimo post electionem mense mortuus est, et inter duos antecessores suos medium sepulturae locum sortitus. Hic omne ius ac servitium, quod ex duabus hubis et area ab prefato Adelberto in Winenheim conquisitis exigebatur, dispositioni et usui fratrum adtribuit. Quo defuncto, rursum laureshamensis abbatiae procuratio ad regalem manum devoluitur. Unde fere per triennium fratres ad extremam redacti inopiam, tum ex annorum diutina sterilitate, tum ex procuratorum sua quaerentium ingluvie, clamaverunt tandem ad dominum, et de necessitatibus eorum liberavit eos.